

# KEBAKTIAN ADVEN **KETIGA** KELUARGA BNKP TAHUN 2013

## 1. **Fanunu Lili + Votum**

No tarugi ofeta ita ba Adven si tölu. Iada'e tefa'elö khöda wa no sindruhu ba satulö Lowalangí. Ohitö dodo-Nia ba wangorifi, no tefa'ele'ö l'otarai ba gamabu'ula li si föföna, si no tefaulugö ba wa'atohare Yesu, si tumbu ba kandra ba Mbetilekhema.

Data'owuawua'ö dödöda, datafalua wotunu lili ...

*sökhi na datölu göi zanunu lili na ato niha ba nomo ..*

Tafalua ia ba döi Lowalangí Ama, somböi banua si yawa awö danö, ba döi Yesu Keriso, razo satulö, ba ba döi Geheha Ni'amoní'ö, sangehao tödöda. Yaduhu!

## 2. **Manunö Buku Zinunö No. 34:1-2** **“Me Möi Khöda Zoaya”**

1. Me möi khöda Zo'aya, ya dozi manunö ita  
Ya'omuso dödöda, meno tohare Razoda  
Lö itenawa ita, na ta'ondrasi la
2. Me möi khöda Zo'aya, oi iheta zifatimba  
Ibe khöda geheha, samatörö fa'aurida  
Sangamuri tödöda, wanörö lala haga

## 3. **Angerönuu**

1. Fombaso Zakharia 9:9-10
2. Fangandrö
3. Fama'ema huhuo

## **MI'A'IKI, MI'OWUAWUA'Ö DÖDÖ** ***Zakharia 9:9-10***

Da'ifuli itörö tödöda geluaha Adven, ya'ia da'ö "Fa'atore".

Me adven si föföna no tekaoni ita wama'anö ba wamaondragö fa'atohare Yesu dania si mendrua.

Ba Adven si dua, tefasugi ba dödöda ba wamareso fa'aurida, hadia lö sifaröi ita ba wamati, na inötö wa'atohare Yesu khöda zamösana, na mofozu wa'aurida? Itaria ba ginötö andre, so manö zi lö faduhu dödö wa'atohare Yesu si mendrua, ba ato göi zangositengagö Lowalangi. Bahiza, ma'ökhö andre, te'a'aro'ö ita ba wa'afaduhu dödö, wa tenga fayafaya nifaduhu'ö ba Daroma Li Lowalangi. Heza oroma khöda da'ö? No so gohitö dödö Lowalangi ba wangorifi ösi gulidanö, ba tenga ha me awena tohare Yesu. Ngaotu fakhe föna da'ö, ba gamabu'ula li siföföna, no lfa'ele'ö nösi dödönia Lowalangi, wamatenge sangorifi, razo satulö, solohe fa'ohahau dödö. Taroma Li Lowalangi nibasoda moroi ba Zakharia 9:9-10 andre, no fama'ele'ö fa'atohare Mesia, razo satulö andrö. Bu'u Li da'e, no tefaulugö ba wa'atohare Yesu, si tumbu ba kandra ba Mbetilekhema.

Fama'ele'ö wa'atohare Mesia ba zura Zakharia andre, no sambua fonrrara dodo ba Ndraono Gizara'eli me luo da'ö. Hana, ba hadia zifalukha ya'ira? Me no mangawuli ira moroi ba danö si no te'oloi'ö ira, moroi ba Mbabeli, larugi Yerusalema ba lafuli la'otomosi Nomo Lowalangi, ba la'otomosi göi wa'aurira. Bahiza, me no mangawuli ira ba Yerusalema, no so manö ira barö mbawa soi bö'ö, ya'ia da'ö barö wamatörö Soi Weresia. La dönadöna razo simane Dawido luono, bahiza lö tohare-hare. Lö mendrua manö me ihawui ira fa'anumana, ba oi fatiu dodo soi si so fasuira. Börö ngawalö zifalukha andrö wa ibörögö aetu wanötönara. Andrö l'ombakha'ö Zakharia hadia niwa'ö Lowalangi khöra, ba edöna tohare razo satulö. Tenga simane razo ba gulidanö sosi'a'aigö fa'abölö ba fa'atuatuara, somasi fasuwö ba samakao awöra. Tenga göi ba wamatörö niha Yehuda, razo satulö sedöna tohare andrö. No razo, yawa razo fefu soi ba gulidanö, razo solohe fangatulö ba niwöwöi fefu.

Andrö ba Adven si tölu andre, tekaoni ita fefu, simane fogaoni niha Yehuda luono,

- (1) **Ena'ö sowuawua tödö ita**, me si lö faröi Lowalangida andrö. Ba ayati 9 tabaso imane: "Abölö'ö a'iki, ya'ugö ono Ziona alawe! Owuawua'ö dödö, ya'ugö ono Yerusalema alawe!". Hana? Me tohare razoda, razo satulö, sabölö, sohauhau, ba si lö fayawasa. Ya'ia zedöna tohare wangeheta banua-Nia moroi ba wamakao ba fangaröngarö.

*No göi sambua fondera dödö khöda Daroma Li andre. Ba ngawalö wa'abu dödö sifalukha ita bongi ma'ökhö, böi ahöndrö ita ba laza fa'alangulangu dödö, böi aetu wanötöna, me si lö faröi Lowalangida. Tenga faya mbu'u Li Lowalangi. No tefalua da'e ba khö Yesu Keriso si no möi ba gulidanö. Andrö data'owuawua'ö dödöda, ba ena'ö saro ita ba wanötöna khö Lowalangi, si lö faröi andrö. Imanuel, awöda Lowalangi.*

- (2) Tekaoi göi ita **ba wamalua fangatulö ba gulidanö**. Hana? Me Razo sitohare andrö, no Razo si tenga molohe fana, föda – möi fasuwö. No razo solohe fangatulö ba fa'ohahau ba gulidanö.

*Andrö ba ginötö adven andre dafalua wangatulö khö yomo ba nomo andre, ba simanö göi ba nawöda, na so zi no fatiti khöda. Taröi watitisa, taröi wa'udusa, tafalua wariawösa si sökhi ba niha fefu.*

- (3) Ta'okhögö mbuabua **fangidengide'ö**, simane razo satulö si tohare andrö, si so yawa ba hulu Galide, tanda wa'ohauhau (*lemah lembut*) ba fangidengide'ö (*rendah hati*).

*Moguna sibai dumaduma da'e ba ginötö andre, me amuata salua ba ginötö andre, no amuawa waya'osa ba fayawasa.*

Andrö ba wondrugida adven si-3 andre, dataheta khöda wa'aisö mbawa, ba dataröi gamuata fa'aombö dodo, ba böi tabusi tödö ngawalö wamakao, fo'amböta ba fangaröngarö; me si lö faröi Lowalangida andrö. Data'odaligö Lowalangi ba wamalua halöwöda sero ma'ökhö, Ya'ia zangabölö'ö, sangatuatua'ö ba samahowu'ö ya'ita.

#### 4. **Manunö Buku Zinunö No. 35:1-2** **"Hiza Tohare Mesia"**

*ba te'owulo wasömbata khö Lowalangi*

1. Hiza tohare Mesia, Ono fondrege Zalawa  
Solohe khöda aurifa, soroi Lowalangi Ama  
Sangatulö'ö ya'ita ba samohouni tödöda  
Tasuno Zo'aya same fa'aurida
2. Hiza tohare Mesia, Ono wondrege Zalawa  
Datafa'anö dödöda, ba wanema'ö Ya'ia  
Tödöda zumangenia, fanunö wangowai-Nia  
Tasuno Zo'aya same fa'aurida

**5. Fangandrö (doa syafaat)  
Fangandrö Zo'aya**

**6. Manunö Buku Zinunö No. 35:3  
“Hiza Tohare Mesia”**

3. Hiza tohare Mesia, Ono wondrege Zalawa  
Ta'omusoi'ö dödöda, me sangöhöli ya'ita  
Sangomasi'ö ya'ita, sahakhö tödö ba niha  
Tasuno Zo'aya same fa'aurida

**7. Howuhowu**

Yafalukha ita fefu wa'ebua dödö Zo'aya ya'ita Yesu Keriso,  
Fa'omasi Lowalangi Ama, ba Fa'awösa Geheha Ni'amoni'ö.  
Yaduhu!

**8. Manunö “Duhu, Duhu, Yaduhu”**

**9. Ya'ahowu**

*Bersalam-salaman*

**Selamat Adven *Ketiga* 2013**